

四庫全書總目

上海大東書局印行

第 十 三 冊

卷七十	地理類三
卷七十一	地理類四
卷七十二	地理類存目一
卷七十三	地理類存目二
卷七十四	地理類存目三
卷七十五	地理類存目四
卷七十六	地理類存目五

欽定四庫全書總目卷七十

史部二十六

地理類三

南嶽小錄一卷

浙江汪汝璣家藏本

唐道士李冲昭撰卷首有自序稱弱年悟道近歲依師泊臨嶽門頻訪靈蹟徧閱古碑及衡山圖經湘中記仍致詰於師資長者嶽下耆年或得一事旋貯篋笥撮而直書總成一卷案書中有咸通年號當作於懿宗以後序末所題壬戌歲蓋昭宗天復二年也舊唐書經籍志新唐書藝文志皆不著錄鄭樵通志藝文略始載有此名與此本卷數相合惟冲昭作仲昭或傳刻誤歟書中先列五峯三澗次敘宮觀祠廟壇院之屬而以歷代得道飛昇之迹附之雖黃冠自張其教不無夸誕之辭而唐世名山洞府之書如盧鴻一嵩山記張密廬山雜記令孤見堯玉笥山記杜光庭武夷山記今並無存此獨以舊本流傳勝境靈蹤足資掌故是亦考圖經者所宜徵據矣此本爲明蔡汝楠守衡州時所刻前有小引亦謂所載事蹟名物悉與今本不同云

廬山記三卷附廬山紀略一卷

兵部侍郎紀昀家藏本

宋陳舜俞撰舜俞字令舉烏程人所居曰白牛村因自號白牛居士慶歷六年進士嘉祐四年又中制科第一歷官都官員外郎熙寧中出知山陰縣以不奉行青苗法謫南康監稅事蹟具宋史本傳舜俞謫官時與致仕劉溪游覽廬山嘗以六十日之力盡南北山水之勝每恨慧遠周景武輩作山記疎略而漢舊嘗雜錄聞見未暇詮次舜俞因採其說參以記載者舊所傳畫則山行夜則發書考證泓泉塊石具載不遺折衷是非必可傳而後已又作俯仰之圖尋山先後之次以冠之人服其勤自記云余始游廬山問山中塔廟興廢及水石之名無能爲子言者雖言之往往襲謬失實因取九江圖經前人雜錄稽之本史或親至其處考驗銘志參訂耆老作廬山記其湮泐蕪沒不可復知者則闕疑焉凡唐以前碑記因其有歲月甲子爵里之詳故并錄之庶或有補史氏云云其

目有總敘山篇第一敘北山篇第二敘南山篇第三而無第四五篇圖亦不存勘驗永樂大典所闕亦同然北宋地志傳世者稀此書考據精核尤非後來廬山紀勝諸書所及雖經殘闕猶可寶貴故特錄而存之釋惠遠廬山紀略一卷舊載此本之末不知何人所附入今亦併錄存之備考焉

赤松山志一卷

兩淮馬裕家藏本

宋道士倪守約撰守約未詳何許人書前自序稱捨家辭父母來投師資又自署松山羽士知爲黃冠書中稱眞廟神廟孝廟寧廟知爲宋人人物之末稱咸淳年號知作於度宗時矣其書首序呈初起皇初平兄弟仙迹以著是山靈異爲全書綱領次丹類次洞類次山類次水類次宮宇類次人物類次制誥類次碑籍類書末又有正統四年明英宗御製數行非詩非文似乎聯額與此書篇頁不相屬蓋後人所附入明代刊本喜於竄亂古書往往如是今刪汰不錄以存守約之舊焉

西湖遊覽志二十四卷志餘二十六卷

浙江汪啟淑家藏本

明田汝成撰汝成有炎微紀聞已著錄是書雖以游覽爲名多記湖山之勝實則關於宋史者爲多故於高宗而後偏安逸豫每一篇之中三致意焉宋乾道開周淞撰臨安志十五卷咸淳開潛說友又續成一百卷湖山特其中之一目例不當詳吳自牧作夢粱錄周密作武林舊事於歲時風俗特詳而山川古蹟又在所略惟汝成此書因名勝而附以事蹟鴻纖鉅細一一兼該非惟可廣見聞併可以考文獻其體在地志雜史之間與明人游記徒以觴咏登臨流連光景者不侔其志餘二十六卷則摭拾南宋軼聞分門臚載大都杭州之事居多不盡有關於西湖故別爲一編例同附錄蓋有此餘又以消納其冗碎而後本書不病於蕪雜此其義例之善也惟所徵故實悉不列其書名遂使出典無徵莫能考證其眞僞是則明人之通弊汝成亦未能免俗者矣

桂勝十六卷

浙江鮑士恭家藏本附桂故八卷

兩淮鹽政採進本

明張鳴鳳撰鳴鳳有西遷註已著錄是二書並成於萬歷癸丑桂勝序題五月六日桂故序題七月朝劉繼文序

稱前十六卷爲桂勝志桂槩也後八卷爲桂故志故實也鳴鳳桂勝自序亦稱外桂故八卷用輔以行桂故自序稱余志桂勝竊迹前事云云則二書相因而作實一書也桂勝以山水標目各引證諸書敘述於前即以歷代詩文附本條下而於石刻題名之類搜采尤詳又隨事附以考證多所訂正後董斯張吳興備志朱彝尊曰下舊聞即全仿其體例於地志之中最爲典雅桂故分郡國官名先政先獻游寓雜志六門郡國考歷代沿革詳列史志辨今之桂林非古之桂林官名則臚舉歷代之制蓋疆域明則先獻有所斷限職制明則先政有所徵驗乃不至如他志書人物名宦附會牽合故以冠於首也其先政先獻人各爲傳大抵錄舊文竊裁蔓語務取其有關是土而不濫涉其生平又多採金石之文不盡取諸史籍故其辭簡而不支博而有據其游寓雜志亦多據題名碑碣姓名年月歷歷可稽在明代輿記之中於康海武功志韓邦靖朝邑志外自爲別調可以鼎立而三他家莫之逮也二書所載皆止於南宋蓋年遠者易湮時近者易濫詳人所略略人所詳其書乃博瞻而有體是又鳴鳳創例之微意歟

欽定盤山志二十一卷

國朝大學士蔣溥等奉 敕撰盤山在薊州城北二十五里爲漢末田疇隱居之地五峰三盤林壑幽邃單椒秀澤雄甲畿東自 聖祖仁皇帝四度臨幸 宸章題詠照燦巉阿然舊無山志青溝釋智朴始草創成編辭旨允蔓體例尙多未備我 皇上宸游莅止靈境日開乾隆九年始 命發內帑建 靜寄山莊於山之陽天閣名區全攬勝槩歲春秋有事於 祖陵每駐蹕 行宮 幾餘靜憩智仁樂趣暢洽 宸襟山水效靈益增神秀乾隆十九年二月因 行幸山莊爰 命蔣溥汪由敦董邦達纂修新志溥等承 詔屬槩詳加哀輶分圖考名勝寺宇流寓方外藝文物產雜綴八門釐爲十六卷首冠以 巡典 天章五卷至十二月書成奏表恭進焉 等敬釋審製旁考舊聞惟茲山之觀濶深奧足與嶽鎮競秀而其名不大顯於前世以是知天地清淑之氣扶輿磅礴固必待時而出以奉 大聖人汗奩之娛而 天筆昭回鑒燿谷品題甲乙榮幸無涯尤自古所未 有敬錄斯編亦

以慶茲山之遺也

西湖志纂十二卷

內府藏本

國朝大學士梁詩正禮部尚書銜沈德潛等同撰初雍正中浙江總督李衛修西湖志延原任編修傳王露總其事而德潛以諸生爲分修凡成書四十八卷雖敘次詳明而徵引浩繁頗嫌冗蔓至乾隆十六年恭逢 聖駕南巡清蹕所臨湖山生色德潛因取舊志復與王露重加纂錄芟繁就簡別爲十卷而梁詩正亦 奏請重輯西湖志會德潛書彙先成繕錄進 御蒙 皇上優加錫賚 特製詩篇以升其首竝 敕詩正卽以德潛此彙合成之詩正復偕王露參考釐訂爲十二卷於乾隆十八年十二月奏 進首名勝各圖次西湖水利次孤山南山北山吳山西溪諸勝蹟而終以藝文雖門目減於舊志而大綱已包括無餘且 仲荷 宸翰親題榮光下燭尤從來與記所未有固非田汝成輩區區記載所得竝稱矣

右地理類山川之屬七部一百十三卷皆文淵閣著錄

洛陽伽藍記五卷

編修廟守謙家藏本

後魏楊街之撰劉知幾史通作羊街之晁公武讀書志亦同然隋志亦作楊與今本合疑史通誤也其里貫未詳據書中所稱知當官撫軍司馬耳魏自太和十七年作都洛陽一時篇崇佛法剎廟甲於天下及永熙之亂城郭邱墟武定五年街之行役洛陽感念廢興因拮拾舊聞追敘故蹟以成是書以城內及四門之外分敘五篇敘次之後先以東面三門南面三門北面三門各署其新舊之名以提綱領體例絕爲明晰其文機麗秀逸煩而不厭可與酈道元水經注肩隨其兼敘爾朱榮等變亂之事委曲詳盡多足與史傳參證其他古迹藝文及外國土風道里採摭繁富亦足以廣異聞劉知幾史通云素人不死驗符生之厚誣蜀老猶存知葛亮之多枉蜀老事見魏書毛修之傳秦人事卽用此書趙逸一條知幾引據最不苟知其說非鑿空也他如解魏文之苗茨碑糾戴延之之西征記考據亦皆精審惟以高陽王雍之樓爲卽古詩所謂西北有高樓上與浮雲齊者則未免固於說詩爲是書之瑕類耳據史

通補註篇稱除煩則意有所憾畢載則言有所妨遂乃定彼榛楛列爲子註若蕭大圖淮海亂離志幸街之洛陽伽藍記是也則衍之此記實有自註世所行本皆無之不知何時佚脫然自宋以來未聞有引用其註者則其刊落已久今不可復考矣

吳地記一卷附後集一卷

江蘇巡撫孫道本

舊本題唐陸廣微撰宋史藝文志作一卷與今本台書中稱周敬王六年丁亥至今唐乾符三年庚申凡一千八百九十五年則廣微當爲僖宗時人然書中虎嘯一條稱唐諱虎錢氏諱鏐改爲潯聖考五代史吳越世家乾符二年董昌始表錢鏐爲偏將光啟三年始拜鏐左衛大將軍杭州刺史景福二年始拜鏐爲鎮海軍節度使潤州刺史乾寧元年始加鏐同中書門下平章事二年始封鏐爲彭城郡王天祐元年封吳王至朱溫篡立始封鏐爲吳越王安得於乾符三年以董昌一偏將能使人諱其嫌名且乾符三年亦安得預稱吳越至錢俶於宋太平興國三年始納土入朝當其有國之時蘇州正其所隸豈敢斥之曰錢氏尤顯爲宋人之辭則此書不出廣微更無疑義王士禎香祖筆記嘗摘其語兒亭馮驪宅公孫挺陳開疆顧冶子墓三條又摘其琴高宅一條於地理事實皆爲舛謬又案乾符三年歲在丙申實非庚申上距周敬王丁亥僅一千三百九十年實非一千八百九十五年於年數亦復差誤觀其卷末稱纂成圖畫以俟後來者添修而此本無圖前列吳長洲嘉興崑山常熟華亭海鹽七縣而後列吳縣長洲縣事爲多殆原書散佚後人採掇成編又竄入他說以足卷帙故譌異若是耶以今世所行別無善刻故姑仍吳郡此本錄之以存梗槩而附訂其牴牾如右又吳地記後集一卷蓋續廣微之書者不著撰人名氏前有題詞稱自唐王郢叛亂市邑廢毀或傳記無聞或廢興不一謹採摘縣錄據圖經選其確實者列於卷後所記建置年號止於祥符元年疑北宋人作舊本附錄今亦併存備考焉

長安志二十卷

兩淮馬祐家藏本

宋宋敏求撰敏求有唐大詔令已著錄是編皆考訂長安古蹟以唐韋述西京記疎略不備因更博採羣籍參校成

書凡城郭官府山川道里津梁郵驛以至風俗物產宮室寺院纖悉畢具其坊市曲折及唐盛時士大夫第宅所在皆一一能舉其處粲然如指諸掌司馬光嘗以爲考之葺記其詳不啻十倍今韋氏之書久已亡佚而此志精博宏贍舊都遺事藉以獲傳實非他地志所能及程大昌雍錄稱其引類相從最爲明晰然細細校之亦不免時有駁複如曲臺既入未央而又入之三雍是分一爲二矣長門宮在都城之外長門亭畔而列諸長信宮內則失其位置矣況宮殿園囿又多空存其名不著事迹則亦無可尋繹矣云云其說雖不爲無見實則凌雲之材不以寸折爲病也敏求尚有河南志與此凡例稍異而竝稱贍博今已不存又楊慎丹鉛錄謂杜常華清宮詩見長安志詩中曉風乃作曉星檢今本實無此詩蓋愼喜僞託古書不足爲據非此志有所殘闕惟晁公武讀書志載有趙彥若序今本無之則當屬傳寫佚脫耳

洛陽名園記一卷

兩江總督孫進本

宋李格非撰格非字文叔濟南人元祐末爲國子博士紹聖初進禮部郎提點京東刑獄以黨籍罷是書記洛中園囿自富弼以下凡十九所格非自跋云天下之治亂候於洛陽之盛衰洛陽之盛衰候於園囿之興廢蓋追思當時賢佐名卿勲業盛隆能享其樂非徒誇臺榭池館之美也書錄解題郡齋讀書志俱載李格非撰惟津逮祕書題曰華州李薦考邵博聞見後錄第十七卷全載此書不遺一字題標格非之名同時之人不應有誤知毛晉之誤題審矣王士禎居易錄記是書前有紹興中張琰德和序首曰山東李文叔云云此本亦佚之殆又後人因標題姓名與序不符而刊除其文歟

雍錄十卷

大學士于敏中採進本

宋程大昌撰大昌有古周易占法已著錄是編考訂關中古蹟以三輔黃圖唐六典宋敏求長安志呂大防長安圖記及紹興祕書省圖案書中稱關圖者即祕書省圖諸書互相考證於宮殿山水都邑皆有圖有說謂三輔黃圖由唐人增續初非親生漢時目覩漢事故隨事立辨不以其名古而不敢置議長安志最爲明晰然亦時有駁複呂大防圖凡唐世邑

屋宮苑已自不存特其山川地望悉是親見今故本而言之若與古記不合亦復訂正其參校亦可謂勤矣今考其書如函谷關參都邑之中太子宮序職官之次地圖之後忽列書目數條都邑之前突出山名一處驟然尋之不得端緒體例稍爲叢雜又集古諸錄所列碑刻自徂徠以外罕登紀載考古圖有葦酌宮亦不著其名蓋但憑圖籍而未考金石之文故未免於疎漏然其蒐羅既富辨證亦詳在輿記之中固爲最善之本也明代陝西諸志皆號有法其亦以是數書者在前歟考大昌之時關中已爲金土而隔越江表爲隣國著書殊爲無謂蓋孝宗銳意恢復有志中原大昌所作北邊備對一書卽隱寓經略西北之意此書猶此志焉耳第五卷中特勅漢唐用兵攻取守備要地一圖其圖說多舉由蜀入秦之迹與郭允蹈蜀鑑所謂由漢中取關陝者大旨相合其微意固可見矣

洞霄圖志六卷

浙江孫仰曾家藏本

宋鄧牧撰牧字牧心錢塘人宋亡後隱居屏迹惟與謝翱友善翱臨終時牧適出游翱絕筆詩所謂九鎖山人歸不歸者卽爲牧作其志趣可以想見矣洞霄宮在餘杭縣大滌洞天巖壑深秀爲七十二福地之一宋世嘗以舊宰執之奉祠者領提舉事政和中唐子霞作真境錄紀其勝後不傳端平間有續錄今亦無考牧於大德己亥入洞霄止超然館住持沈多福爲營白鹿山房居之遂屬牧信本山道士孟宗賈搜討舊籍作爲此志凡六門曰宮觀曰山水曰洞府曰古蹟附以異事曰人物分列仙高道二子目曰碑記門各一卷前有元教嗣師吳全節及多福二序後有錢塘葉林台州李洧孫二跋牧文章本高曠絕俗故所錄皆詳略有法惟不載宋提舉官姓名近時朱彝尊始作記以補之然宋代奉祠率皆遙領與茲山古蹟不甚相關正如魏晉以下之公侯名繫郡縣而事殊茅土志乘之中載之不爲贅削之亦不爲闕也牧成此書在大德乙巳至明年丙午春而牧卒此書第五卷後附住持知宮等題名有及丙午六月後事者疑爲道流所增入又人物門有牧及葉林二傳前題續編二字亦不知續之者爲誰舊本所有姑併存之又書稱圖志而此本乃有志無圖當爲傳寫所脫佚無可校補亦姑仍其闕焉

長安志圖三卷

安徽巡撫採進本

元李好文撰好文字惟中東明人至治元年進士官至光祿大夫河南行省平章政事致仕給翰林學士承旨一品祿終其身事蹟具元史本傳此書結銜稱陝西行臺御史考本傳稱好文至正元年除國子祭酒改陝西行臺治書侍御史尋遷河東道廉訪使又稱至正四年仍除陝西行臺治書侍御史六年始除侍講學士此書蓋再任陝西時作也自序稱圖舊有碑刻元豐三年呂大防爲之跋謂之長安故圖蓋卽陳振孫所稱長安圖記大防知永興軍時所訂者好文因其舊本芟除謬駁更爲補訂又以漢之三輔及元奉元所屬者附入凡漢唐宮闕陵寢及渠涇沿革制度皆在焉總爲圖二十有二其中渠涇圖說詳備明晰尤有裨於民事非但考古蹟資博聞也本傳載所著有端本堂經訓要義十一卷歷代帝王故事一百六篇又有大寶錄大寶龜鑑二書而不及此圖元史疎漏此亦一端矣此本乃明西安府知府李經所錄列於宋敏求長安志之首合爲一編然好文是書本不因敏求而作強合爲一世次素越既乖編錄之體且圖與志兩不相應尤失古人著書之意今仍分爲二書各著於錄干頃堂書目載此編作長安圖記於本書爲合此本題曰長安志圖疑李經與長安志合刊改題此名然今未見好文原刻而干頃堂書目傳寫多譌不盡可據故今仍以長安志圖著錄而附載其異同於此備考核焉

汴京遺蹟志二十四卷

河南巡撫孫道本撰

明李濂撰濂有祥符先賢傳已著錄是書以歷代都會皆有專志獨汴京無之又宋孟元老東京夢華錄筆穢狼瑣無足觀

案元老書記風俗瑣事與地志體殊此語過當謹附訂於此

遂撫拾舊聞編次成帙義例整齊頗有體要徵引典核亦具見根據在輿記

之中足稱善本雖其精博詳晰不及長安志雅錄諸書而自宋梁以迄金源數百年間建置沿革之由興廢存亡之迹皆爲之彙考臚編略存端緒亦復粲然如指諸掌宋敏求東京記今已不傳得濂此書亦足以補其闕矣

武林梵志十二卷

浙江汪汝璩家藏本

明吳之鯨撰之鯨字伯奇錢塘人萬歷己酉舉人官浮梁縣知縣是編以杭州梵刹盛於南宋至明而殘廢者多恐遺蹟漸湮乃博考乘牒分城內城外南山北山及諸屬縣凡得寺院四百二十六所俱詳誌創置始末及其山川形

勝後分天朝寵錫宰官護持古德機緣歷代勲績四門備紀名流勝蹟高僧支派各編小傳序錄井然頗有條理其中採輯宋元明人詩文如仙林崇先二寺記見曹勛松隱集智果寺記見徐一夔始豐集而志俱失載不免稍有脫漏又如宋張敦禮捨鐘之法雲寺非杭之法雲寺而以名同誤入又撰法相寺碑記者前作范楷後作沈楷亦有駁文然其搜剔幽隱實多武林遺事西湖游覽志所未載如明遠堂詩次於蘇軾諸作之後而東坡集無之張九成喻彌陀塔銘亦不見於橫浦集張伯雨天池樓詩與本集互異可以參考其遺聞軼事亦足爲考古談藝之資正不徒爲仰藍增故實矣

江城名蹟二卷

江西巡撫採進本

國朝陳宏緒撰宏緒字士業新建人明末以薦授晉州知州時劉宇亮以閩臣督師欲移兵入晉州宏緒拒不納坐誦爲湖州府經歷鼎革後終於家是書以南昌省會爲南昌新建二縣地固考其名蹟以城之內外爲限凡去城遠者則不及多詳於樓觀祠宇枕利園亭之類卷上爲考古卷下爲證今自序謂古與今不以時代爲斷而一以興廢存亡爲斷蓋事皆目歷非徒案籍而登也宏緒文章淹雅在明末號能復古故作是書敘次頗有條理考證亦多精核惟喜載雜事多近小說且多曼衍芻涉如天寧寺條下載寺僧淫褻之類頗乖大雅亦非地志之體是則體例未嚴不免爲白璧之瑕矣

營平二州地名記一卷

兩淮鹽政採進本

國朝顧炎武撰炎武有春秋杜解補正已著錄案爾雅營州孫炎註以爲殷制孔穎達尚書疏謂舜十二州有營州殷本虞制分青州地爲之凡在遼水東者東至朝鮮之境皆古營州地也平州卽今永平府在虞時亦爲營州地秦時爲右北平遼西地後漢晉皆爲遼西地後漢末公孫度自號平州牧於是平州之名始見於史炎武遊永平時郡人以志屬之炎武未應其求因撫古來營平二州故實纂爲六卷付之題曰營平二州史事今其書不存此本出自惠棟紅豆齋惟載二州古地名至五代而止又僅一卷意其爲六卷之一也其中卑耳之谿一條既引管子

欽定四庫全書總目卷七十

最後一頁又載余兄一事全文當是隨筆雜鈔失於刪削不但非其完書竝爲未定之藁本突然炎武嫻於地理所纂述多可依據書雖殘闕要於考證之學不爲無補焉

金釐退食筆記二卷

太學士英廉購進本

國朝高士奇撰士奇有春秋地名考略已著錄是編乃其康熙甲子官侍講學士入侍內廷時所作前有自序稱自丁巳賜居太液池之西朝夕策馬過金釐王棟橋望苑中景物七閱矣暑退食之頃偶訪曩時舊制約略得之傳聞者而又彷彿尋其故址離宮別館廢者多矣脫復十數年老監已盡遺蹟漸湮無以昭我皇上卑宮室約園囿之儉德因率筆記之詳於西而略於東以所居在苑西故也紀其興廢而復雜以時事欲見昭代之盛存爲太平佳話也又稱衙署監局載在會典者不書訪問未確者不書外人所罕窺者亦不敢書蓋其時出明末僅四十年前朝宦豎存者猶多士奇出入禁廷得以詢訪又久寓其旁朝夕考校故所記往往可據朱彝尊曰下舊聞多採掇之今奉詔考定葬會之書徵據詳明纖悉必備此編已在包括之中顧其草創記錄之功亦不可沒故仍錄存之以備參稽焉

石柱記箋釋五卷

浙江巡撫採進本

國朝鄭元慶撰元慶字芷畦歸安人吳興山水清佳自六朝以來稱東南名郡自唐時刻有石柱記樹之杼山載其山川陵墓古蹟古器甚詳迨傳世既久歲月名字遂漫漶不可考歐陽修作集古錄以爲筆畫奇偉非顏真卿不能書孫覺知湖州聚境內碑碣築壘妙亭貯之凡三十二通石柱記亦居其一後人因府治卑溼壘妙亭諸石盡取以填淤泥而石柱記遂淪沒不復見康熙辛巳元慶重修府志既成復訪得宋槧石柱記爲世所罕觀惟湖州五縣原本祇載其三秀水朱彝尊乃依仿體例摭德清武康二縣事蹟而補之元慶採掇諸書爲之註釋其徵據考證頗爲賅博雖於一郡之勝尙未能包括無餘而軼典遺詞其梗概亦已略具固亦徵文考獻者所不廢矣

關中勝蹟圖誌三十二卷

陝西巡撫採進本

乾隆四十一年巡撫陝西兵部侍郎兼都察院右副都御史畢沅所進也關中爲雍州舊壤班固所稱神皋與區周秦漢唐並建都作邑遺聞舊事見於典籍者至多可以循覽前編考求故址而河山表裏形勢尤雄奇蹟靈蹤亦往往而在諸家撰述之存於今者三輔黃圖以下如宋敏求長安志程大昌雍錄李好文長安志圖何景明雍大記李應祥雍略之類未易一二殫數而山水游記郡邑志乘尙不與焉然體例各殊純駁互見披圖索籍低悟實繁未有舊稭羣言歸於畫一者我國家釀化覃敷羣生茂豫周原郊土慶告屢豐華岳之祠太白之湫俱仰荷宸翰宸題光燭霄宇其秦漢涇渠故道亦皆次第興修守土之臣得乘邊圉寧謐民氣和樂之餘行部川原詢求舊蹟訂譌釐舛勒成是編以上呈 乙覽視儒生著述披尋於斷碑碎碣之間研索於脫簡殘編之內者其廣狹固有殊矣其書以郡縣爲經以地理名山大川古蹟四子目爲緯而以諸圖附於後援據考證各附本條具有始末 臣等謹爲錄副登諸祕閣亦古者郡國地志藏在太史之義也

右地理類古蹟之屬十四部一百二十五卷皆文淵閣舊錄

南方草木狀三卷

兩江總督採進本

晉嵇含撰含事蹟附載晉書嵇紹傳考隋志舊唐志俱有含集十卷

隋志云其集已亡但附載郭象集下舊唐志仍著錄

而不載此書至宋志

始著錄觀此書載指甲花自大秦國移植南海是晉時已有是花而唐段公路北戶錄乃云指甲花本出外國梁大

同二年始來中國知公路未見此書蓋唐時尚不甚顯故史志不載也諸本但題譙國嵇含惟宋麻沙舊版前題曰

永興元年十一月丙子振威將軍襄陽太守嵇含撰云云載其年月仕履頗爲詳具蓋舊本如是明人始刊削之然

晉書惠帝本紀永寧二年正月改元永安七月改建武十一月復爲永安十二月丁亥立豫章王熾爲太弟始改永

興是永興元年不得有十一月又永興二年正月甲午朔以千支推之丙子當在上一年十二月中旬尙在改元前十

二日其時亦未稱永興或其時改元之後併十二月一月皆追稱永興而輾轉傳刻又誤十二月爲十一月歟惟隋

志稱廣州太守嵇含而此作襄陽太守考書中所載皆嶺表之物則疑襄陽或誤題也其書凡分草木果竹四類其

八十種敘述典雅非唐以後人所能僞不得以始見宋志疑之其本亦最完整蓋宋以後花譜地志援引者多其字句可以互校故獨勘謄闕云

荆楚歲時記一卷

兩江總督
採進本

舊本題晉宗懷撰書錄解題作梁人考梁書元帝本紀載承聖三年秋七月甲辰以都官尚書宗懷爲吏部尚書又南史元帝本紀載武陵之平議者欲因其舟艦遷都建鄴宗懷黃羅漢皆楚人不願移此書皆記楚俗當即其人舊本題晉人誤也唐宋志皆作一卷與今本合而通考乃作四卷考書錄解題載懷自序曰傳元之朝會杜篤之上已安仁秋興之敘君道娛蜡之述其屬辭則已洽其比事則未宏率爲小說以錄荆楚歲時風物故事自元日至除日凡二十餘事然則必無四卷知通考爲傳寫之譌又檢今本實有三十六事件知陳振孫所記懷序亦以三字譌爲二字然周密癸辛雜識引張翥乘槎至天河見織女得支機石事云出荆楚歲時記今本無之則三十六事尚非完本也其註相傳爲隋杜公瞻作故多引開皇中杜臺卿玉燭寶典然唐志宗懷荆楚歲時記一卷下又出杜公瞻荆楚歲時記二卷豈原書一卷公瞻所註分二卷後人又合之歟

北戶錄三卷

兩淮鹽政
採進本

唐段公路撰學海類編作公瓚蓋字之譌新唐書藝文志稱爲宰相文昌之孫則當爲臨淄人學海類編作東牟人亦未詳所本歷仕始末不可考惟據書首結銜知官京兆萬年縣尉據書中稱咸通十年知爲懿宗時人而已是書當在廣州時作載嶺南風土頗爲賅備而於物產爲尤詳其徵引亦極博洽如淮南萬畢術廣志南越志南裔異物會要壘枝圖記陳藏器本草唐韻郭緣生述征記臨海異物志陶朱公養魚經名苑毛詩義船神記字林廣州記扶南傳諸書今皆散佚藉此得以略見一二卽所引張華博物志多今本所無亦藉此以考證眞僞條下註文頗爲典贍題登仕郎前參軍龜圖撰不題其姓似爲公路之族然唐書宰相世系表不載其名莫知其審矣唐書藝文志作北戶雜錄疑傳寫誤衍一雜字其作三卷與此本合學海類編所載惟存一卷凡物產五十一條不

爲完本曹浴所錄古書往往如是不足深詰也

桂林風土記一卷

兵部侍郎記
時家藏本

唐莫休符撰休符里貫未詳作此記時在昭宗光化二年休符以檢校散騎常侍守融州刺史其終於何官亦莫能考也此記新唐書藝文志作三卷今存者一卷卷中目錄四十六條今闕火山探木二條蓋殘闕之餘非完書矣朱彝尊曝書亭集有此書跋云閩謝在杭小草齋所錄舊藏徐惟起家跋稱獲自錢塘沈氏是洪武十五年鈔傳此本小草亭題識及洪武年月與彝尊所言合蓋即彝尊所見本也彝尊跋又稱中載張固盧順之張叢元晦路華韋瓘歐陽脩李渤諸人詩向未著於錄亟當發其幽光今觀諸詩外尚有楊尚書陸宏休二首亦唐代軼篇爲他書所未載今全唐詩採錄諸篇即據此本則其可資考證者又不止於譚民風記土產矣

嶺表錄異三卷

永樂大典本

舊本題唐劉恂撰宋僧贊寧笥譜稱恂於唐昭宗朝出爲廣州司馬官滿上京遷擢遂居南海作嶺表錄陳振孫書錄解題亦云昭宗時人然考書中云唐乾符四年又云唐昭宗卽位唐之臣子左有內詞不應直稱其國號且昭宗時人不應預稱諡號殆書成於五代時歟粵東輿地之書如郭義恭廣志沈懷遠南越志皆已不傳諸家所援據者以恂是編爲最古而百川學海及說郛所載寥寥數頁首尾不完蓋僅從類書鈔撮數條以備一種而恂之原本則已久佚宋代太平寰宇記太平廣記太平御覽諸書徵引頗夥然尙多挂漏惟散見永樂大典者條理較詳尙可編次謹逐卷哀輯而佐以旁見諸書者排比其文仍成三卷以復唐志之舊雖永樂大典闕卷數固無從考驗或不免一二之遺而證以諸書似已十得其八九焉唐人著述傳世者稀斷簡殘編已足珍惜此更於放失之餘復成完帙使三百百年博物君子所未睹者一旦頓還其舊觀彌足寶矣恂書體例不可考今不敢強爲分門僅使各以類聚庶便省覽其中記載博瞻而文章古雅於蟲魚草木所錄尤繁訓詁名義率多精核葉廷珪海錄碎事轉爾雅魁陸引此書式隴以證之張世南游宦紀聞引郭璞爾雅註犀有三角之文據此書稱犀二角以辨之歷來考據之家皆

資引證蓋不特圖經之圭臬抑亦蒼雅之支流有裨小學非淺鮮也諸書所引或稱嶺表錄或稱嶺表記或稱嶺表異錄或稱嶺表錄異記或稱嶺南錄異核其文句實皆此書殆以舊本不存轉相裨販故流傳謬異致有數名惟永樂大典所題與唐志合今特從之以存其真焉

益部方物略記一卷

江蘇巡撫採進本

宋宋祁撰祁字子京雍邱人天聖二年進士官至翰林學士承旨諡景文事蹟具宋史本傳是編乃嘉祐二年祁由端明殿學士吏部侍郎知益州時所作因東陽沈立所撰劍南方物二十八種補其闕遺凡草木之屬四十一藥之屬九鳥獸之屬八蟲魚之屬七共六十五種列而圖之各繫以贊而附註其形狀於題下贊居前題列後古書體例大抵如斯今本爾雅猶此式也其圖已佚贊皆古雅蓋力摹郭璞山海經圖贊往往近之註則頗傷蒼澀亦每似所作新唐書蓋祁敘記之文類如是也胡震亨跋引范成大聖瑞花詩證是花開於春夏則祁註稱率以秋開爲非殆由氣候不齊各據所見又引薛濤鶯鶯草詩但娛春日長不管秋風早句證祁註是草春葉晚生之非則橫生枝節夫春日已長非春晚而何雖至虞美人草自屬借人以名物如菊號西施之類必改爲娛美人草曲生訓釋是則支離無所取耳

岳陽風土記一卷

兩江總督採進本

宋范致明撰致明字晦叔建安人元符中登進士第是編乃其以宣德郎謫監岳州商稅時所作不分門目隨事載記書雖一卷而於郡縣沿革山川改易古蹟存亡考證特詳如樂史太平寰宇記謂大江流入洞庭致明則謂洞庭會江江不入洞庭惟荆江夏秋暴漲乃逆泛而入三五日即還名曰翻流水圖經以鄉王廟爲鄭德璘致明則謂爲隋末鄭文秀與董景珍同立蕭統者故其北又有董王廟沈亞之湘中怨記岳陽樓開汜人之歌致明則核以地形謂舟中之歌樓上不辨杜佑通典謂巴邱湖中有曹洲卽曹公爲吳所敗燒船處在今縣南四十里致明則謂今縣西但有曹公渡考之地理與周瑜曹操相遇處絕不相干漢陽圖經謂赤壁卽烏林致明則謂曹操已至巴邱則孫

劉玄拒之於巴陵江夏間所謂烏林卽烏黎口不當在漢陽界世傳華容爲華華臺致明則謂舊臺在景陵界華容隋縣乃取古容城名之鄴道元水經注謂澧水會沅然後入湖致明則謂澧沅雖相通而各自入湖澧所入處名澧口沅所入處名鼎江口皆確有引據異他地志之附會其他軼聞逸事亦頗資採擇敘述尤爲雅潔在宋人風土書中可謂佳本矣

東京夢華錄十卷

編修注如藻家藏本

宋孟元老撰元老始末未詳蓋北宋舊人於南渡之後追憶汴京繁盛而作此書也自都城坊市節序風俗及當時典禮儀衛靡不賅載雖不過識小之流而朝章國制頗錯出其間核其所紀與宋志頗有異同如宋志南郊儀注郊前三日但云齋於大慶殿太廟及青城齋宮而是書載車駕宿大慶殿儀駕宿太廟奉神主出室儀駕詣青城齋宮儀委曲詳盡又如郊畢解嚴宋志但云御宣德門肆赦而是書載下赦儀亦極周至又行禮儀注宋志有皇帝初登壇上香奠玉幣儀既降盥洗再登壇然後初獻而是書奏請駕登壇卽初獻無上香獻玉帛儀又太祝讀冊宋志列在初獻時是書初獻之後再登壇始稱讀祝亦小有參差如此之類皆可以互相考證訂史氏之譌舛固不僅歲時宴賞士女奢華徒以悵悵舊游流傳佳話者矣

六朝事迹編類二卷

兩江總督採進本

宋張敦頤撰敦頤字養正婺源人紹興八年進士由南劍州教授歷官知舒衡二州致仕是編前有紹興庚辰自序結銜稱左奉議郎充江南東路安撫司幹辦公事蓋登第後之二十二年也其書爲補金陵圖經而作首總敘次形勢次城闕次樓臺次江河次山岡次宅舍次識記次靈典次神仙次寺院次廟宇次墳陵次碑刻凡十四門引據頗爲詳核而碑刻一門尤有資於考據惟書以六朝爲名而古迹之中自南唐以逮於北宋如丁謂王安石所建亦具載之殊失斷限又總敘門內六朝保守一篇歷數自吳以來南朝不可北伐北伐必敗卽倖勝亦不能守蓋亦南渡之初力主和議之說者其識見未免卑懦然核諸情事其說亦不爲無因固與江東十鑑之虛張形勢者較爲切實

矣

會稽三賦三卷

禮部尚書曹秀先家藏本

宋王十朋撰十朋字龜齡樂清人紹興二十七年進士第一官至龍圖閣學士諡文忠事蹟具宋史本傳所著有梅溪集此賦三篇又於集外別行一曰會稽風俗賦仿三都賦之體歷敘其地山川物產人物古迹一曰民事堂賦民事堂者紹興中添差簽判廳之公堂也元借寓小能仁寺歲久圯廢十朋始重建於車水坊一曰蓬萊閣賦其閣以元稹詩謫居猶得住蓬萊句得名皆在會稽故統名曰會稽三賦初曠縣周世則嘗爲註會稽風俗賦郡人史鑄病其不詳又爲增註併註後二賦未有嘉定丁丑鑄自跋十朋文章典雅足以標舉茲邦之勝鑄以當時之人註當時之作耳閱目親言必有徵視後人想像考索者亦特爲詳贖且所引無非宋以前書尤非近時地志杜撰故實牽合名勝者可比與十朋之賦相輔而行亦劉逵張載分註三都之亞也

中吳紀聞六卷

浙江鮑士恭家藏本

宋龔明之撰明之字希仲號五休居士崑山人紹興閒以鄉貢廷試授高州文學淳熙初舉經明行修授宜敦郎致仕是書採吳中故老嘉言懿行及其風土人文爲新舊圖經范成大吳郡志所不載者仿范純仁東齋紀事蘇軾志林之體編次成帙書成於淳熙九年明之年已九十有二亦可謂耄而好學者矣宋末書已罕傳元至正閒武寧虞熊修蘇州志訪求而校定之明末常熟毛晉始授諸梓亦多舛謬其子辰後得葉盛菴竹堂藏本相校第六卷多覆超一條其餘頗有異同何焯假以勘定極爲精審然盧熊跋稱其子昱所撰行實附後今兩本皆無之則葉本亦不免於脫佚也

桂海虞衡志一卷

兩江總督孫進本

宋范成大撰乾道二年成大由中書舍人出知靜江府淳熙二年除敷文閣待制四川制置使是編乃由廣右入蜀之時道中追憶而作自序謂凡所登臨之處與風物土俗方志所未載者萃爲一書巒陬絕徼見聞可紀者亦附著